

# 5 pasukan bentang strategi pelaburan

November 23, 2018

BANDAR SERI BEGAWAN, 22 Nov – Para peserta Cabaran Pelaburan Persatuan Pasaran Modal Negara Brunei Darussalam (BCMA) yang telah dikurangkan kepada lima pasukan teratas kini berpeluang untuk membentangkan strategi pelaburan mereka kepada panel hakim dari BCMA dan Autoriti Monetari Brunei Darussalam (AMBD).

Pembentangan di Kementerian Kewangan dan Ekonomi telah berlangsung di hadapan panel hakim yang terdiri daripada Pengarah Kanan dan Pengurus Besar UOB (B) Asset Management Sdn Bhd, Awang Kamal bin Haji Muhmmad; Pemangku Ketua (Cawangan Brunei) Lion Global Investors Limited, Dayang Amalina Diyana binti Dato Paduka Haji Mohd Daud; Pengurus Pasaran Modal AMBD, Dayang Maz Khairunnisa binti Mohidin dan Penolong Pengarah Eksekutif Perbendaharaan dan Pengurusan Pelaburan AMBD, Dayangku Ami Atifah binti Pengiran Dato Paduka Haji Abdul Hamid.

Cabaran pelaburan yang dianjurkan oleh BCMA dengan kerjasama AMBD dan Progresif sebagai rakan strategik ini serta dilancarkan bersama World Investor Week 2018 merupakan inisiatif tahunan yang diketuai oleh AMBD di Brunei yang juga anggota Suruhanjaya Pertubuhan Sekuriti Antarabangsa (IOSCO).

Sebanyak 109 pasukan yang telah mendaftar untuk menyertai cabaran bagi merebut hadiah lumayan terdiri daripada para pelajar Politeknik Brunei, Kolej IGS, Universiti Brunei Darussalam, Universiti Teknologi Brunei, Universiti Islam Sultan Sharif Ali, Kolej Perniagaan Laksamana, Institut Kemuda, Kolej Perdagangan dan Teknologi Cosmopolitan dan Institut Pendidikan Teknikal Brunei.



Panel hakim menyaksikan pembentangan salah sebuah pasukan yang bertanding (kanan).